

Инсоф аҳлининг эътирофлари



17:16 / 28.09.2022 3693

Мавлид ойи кириб келиши билан мухлис мўмин-муслмонларда Ҳабибимиз Муҳаммад соллаллоҳу алайҳи ва салламга муҳаббат, шавқ ва туйғулар ўз-ўзидан қайта жонланади. Ушбу инсоний ва ийманий жараён турткиси билан, вазиятдан унумли фойдаланиш маъносида бу ойда Жанобимизни янада кўпроқ эслаш, шавқлар изҳор қилиш, у зотни янада яқинроқдан таниш ҳаракатлари бутун Исломи оламида турли кўринишларда жонланади.

Мавлид йиғинлари ҳам ана ўша тадбирлардан бири ўлароқ майдонга келган.

Islom.uz портали жамоаси ҳам ушбу анъанага содиқ қолиб, ҳар йили мавлид ойига янги лойиҳалар, маърифий тадбирлар олиб боришга интилиб келади.

Устозимиз шайх Муҳаммад Содиқ Муҳаммад Юсуф раҳматуллоҳи алайҳ бошлаб берган бу хайрли иш бугун ҳам давом этаётгани қувонарли ҳолдир. Бу йилги сийрат ойига бағишланган илмий ҳаракатлар зимнида янги бир лойиҳани сиз азизларга тақдим қилмоқчимиз. У ҳам бўлса – номусулмон мутафаккир ва арбобларинг Расулуллоҳ соллаллоҳу алайҳи ва саллам ҳақларида айтган сўзларидан лавҳалар тақдимидир. Умид қиламизки, бу битиклар азиз ўқувчиларимизда ижобий таассурот қолдиради.

Муҳаммад соллаллоҳу алайҳи ва саллам бану башарнинг саййиди, инсониятнинг фаҳри бўлганларига асло шубҳа йўқ. Бунга тарих ҳам гувоҳдир. Аслида у зотнинг буюкликларига Аллоҳ таолонинг каломи, ваҳийси етарли далил. У зотнинг сўнгги пайғамбар эканларига, рисолатлари чин эканига ақлий ва нақлий далиллар ортиғи билан бор. Бироқ «Сени душманингнинг эътирофи баҳолайди», деганларидек, Расулуллоҳ соллаллоҳу алайҳи ва салламга иймон келтирмаган, у зотнинг динини қабул қилмаган, керак бўлса, у зотга ва у зот келтирган динга душман бўлган кишиларнинг у зот ҳақларидаги эътирофлари алоҳида аҳамиятга эга.

Хусусан, бундай эътирофлар мусулмон юртларда моддий тараққиёт, илм-фан туфайли Ғарбга тобе бўлиб қолган кишиларга янада кучлироқ таъсир қилади. Бу билан уларга ўзлари эргашган кишиларнинг сўзларидан мавзуга оид ҳужжат келтирилган бўлади. Бу эса, ўз навбатида, ҳақни етказишда муҳим таъсирга эга услублардан биридир.

Бугунги ижтимоий тармоқларнинг талаблари, одамларнинг қизиқишларидан келиб чиқиб, битикларни алоҳида лавҳаларда, имкон қадар бу эътирофларни айтган кишиларнинг суратлари билан бойитилган ҳолатда тақдим этиб борилади. Бу ишда хизмат кўрсатган кишиларга холис дуоларингизни умид қилиб қоламиз.

Ҳасанхон Яҳё Абдулмажид